

QEQERTARSUAQ

- **Inuussutissarsiutinik ineriartortitsineq**

Qeqertarsuarmi pisariaqartinneqarpoq inuussutissarsiutitigut periarfissat annertunerusumik sammineqarnissaat, nutsernerup annertunerulersinnaanera illuatungilerniarlugu. Illoqarfik tunisassiassatigut tunisassianillu ineriartortitsinissamut immikkut ittumik periarfissaqarpoq, assersuutigalugu, imermut, aalisakkanut, nunalinerinermilu periarfissanut nutaanut tunngatillugu, kiisalu takornariqarnermi periarfissat nutaat, Qeqertarsuup Tunua suleqatigalugu, ineriartortinnerisigut. Aammattaaq offshore-mut atatillugu pilersuiffittut inissisimaneq nipilersoqataavoq. Inuussutissarsiutinut assigiinngitsunik sammivilinnut (aalisakkanik tunisassiorfik, imermik tunisassiorfik, nunalerineq, takornariaqarneq), nunaminertanik immikkortitsisoqarnissaa qulakkeerneqassaaq, inuussutissarsiornermi ingerlatat assigiinngitsuuneri mianeralugit, aamma suliffissat nutaat sullissinermillu inuussutissarsiutit pingaartillugit.

Kangerlummut tunngatillugu pingaaruteqarpoq, Qeqertarsuaq qanimut suleqatigalugu aalisarnermik inuussutissarsiuteqarnerup ilungersuutiginnissaa, imaluunnit nunalinerinermi periarfissat sammineqarnissaat. Periarfissaq alla tassaavoq, takornariaqarnermi ornittagassatut periarfissat misissornissat nukittorsarneqarnissaallu, tamatumaniilu tikiffikkuminarsaaneq pisariaqartineqarpoq.

- **Ilinniaritaaq**

Illoqarfik arlalinnik ingerlalluurtunik ilinniarfeqarpoq siumullu isigisumik meeqqat atuarfeqarluni, inuusuttulli meeqqat atuarfiannik naammassinnereerneranni, ilinniarfinnik ingerlaqqiffiusunik, suliffinnik misiliffiusinnaasunik, ilinniaqqiffiusinnaasunillu, amigaateqarluni. Ilinniagaqarfinnut ingerlaqqinnissamut qaffassarfiusinnaasut nutaat, Naasorsiooqarfimmik suleqateqarsinnaaneq imaluunniit efterskolemik pilersitsineq, pilersarusiornermi ilaatinneqartariaqarput, peqatigitillugulu ilinniagaqarfiit akornanni suleqatigiissinnaaneq qulakkeerlugu.

Kangerluk ilinniagaqarnissamut killilimmik periarfissaqarpoq, taamaattumillu Qeqertarsuarmiit imaluunnit Qeqertarsuup Tunuani allaniit ikorfartorneqartariaqarluni. Atuarfiup ingerlatai assigiinngitsut, sinaakkuttat ataatsit iluini, ingerlaqqittariaqartarput.

- **Inoqarfiit aamma inigisat pitsaasut**

Qeqertarsuup ilisarnaatigai illut amerlasuut akuttullutik nappaatiterneqarsimasut, aamma illut affarleriaat pitsaasutt. Illoqarfiup immikkoortortaani assigiinngitsuni siunniuteriikkanut arlalinnut, assigiinngisitaartunik sanaartornissamut annikinnerusumut inissaqartitsisoqassaaq, aammalu illoqarfiup kimmuut imaluunnit kujammut alliarortinneratigut, illoqarfiup immikkoortortaani annertussuseq, qulakkeerneqassaaq.

Kangerlummi illut atorneqanngitsut allanut atorneqarsinnaaneri periarfissiuuneqassapput, aserfallakkiartuinnaqqunagit, peqatigitilluguli isaterinissamik pisariaqartitsisoqarnera naatsorsuutigineqartariaqarpoq.

- **Kulturi kinaassuserlu**

Qeqertarsuarmi kulturikkut ingerlatat nukittorsarneqassapput illoqarfiup iluani tigussaasunik sinaakkutaqartitsinikkut, assersuutigalugu naapittarfitsigut, pingaartumilli meeqqanut inuusuttunullu silami ingerlanneqarsinnaasut amerlinerisigut, aamma peqatigiiffeqarnikkut. Tamanna pilersarusiornikkut isumagineqassaaq. Pinngortitaq innuttaasut inuuneranni annertuumik sunniuteqarpoq, ingerlanneqartartullu soorlu qimusserneq, alisarneq, piniarneq, sisorarneq, pisuttuarneq allallu, tamaani kulturimik pilersitseqataapput, kulturimilli ingerlatsiviit pioreersut illoqarfimmi takusaanerusariaqarput.

Kangerluk, Qeqertarsuup, ilami Qeqertarsuup Tunua ataatsimut isigalugu, kulturikkut ingerlatsinerani eqqarsaatsinut ilaatinneqartariaqarpoq.

- **Toqqissisimaneq inuunerinnerlu**

Suliniutit assigiinngitsut toqqissisimanermik pilersitseqataasinnaapput. Assersuutigalugu sunngiffimmi neqeroorutit nalinginnaasut arlallit, pinaveersaartitsiniutitut atorneqarsinnaasut, tapersersorneqarsinnaapput allaffissornikkut inissatigullu (soorlu naapittarfiit aamma sannaviit). Qeqertarsuaq katersuuffiusinnaasunik piukkunnartunik arlalinnik peqarpoq, nerrivilersorlugit issiavilersorlugillu orniginarsarneqarsinnaasunik, aammattaaq aqqissuussanik aqqusineeqqersuinikkut illoqarfik ataqatigiinnerulersinneqarsinnaavoq, innuttaasullu periarfissanik arlalinnik toqqagaqareernikuupput.

Kangerlummi, ataatsimoortarfittut atugassamik pisortat ingerlatsiviisa pilersitsinerat, nunaqarfimmi toqqissisimasumik inuuneqarnermut ikorfartuutaassaaq.

- **Peqqissuseq pinaveersaartitsinerlu**

Qeqertarsuarmi silami suliniuterpasuit nunaminertatigut tapersersorneqartariaqarput, anguniakkanik assigiinngitsunik piviusunngortitsisoqarsinnaangorlugu, tamakkua ssersuutigalugu makkuusinnaapput grillerisarfiit, arsamik pinnguarfiit tamakkualu eqqaanni pinnguartarfiliornissamik kissaatigisat. Peqatigitillugulu qimmiliveqartarneq attatiinnarneqassaaq illoqarfimmi naleqquttumik inissillugit.

Pinaveersaartitsinermi suliniutit aamma sunngiffimmi ingerlatanut, naapittarfinnut, ilinniartitaanermut allanullu sammitinneqarsinnaapput.

- **Angallanermi periarfissat pilersuinerlu**

Qeqertarsuarmi umiarsualivimmi periarfissat pitsanngorsarneqarsinnaapput, inuussutissarsionermi periarfissat assigiinngitsut, innuttaasunillu sullissineq, ikorfartorniarlugit, tamanna aamma qajartorfiusinnaasunut, umiatsiaaqqat tulattarfiinut puttasunnullu tunngavoq. Illoqarfik, angallanermut tunngatillugu, pingaartumik ukiuunerani, Qeqertarsuup Tunuata sinneranut tunngatillugu kipiluttunartumik inissisimavoq, umiatsiaarsortullu silap pissusaasa allangornerannit annertuumik eqqugaasarput. Illoqarfiup kangiatungaani nunaminertamik mittarfiliorfissamik immikkoortitsisoqarnikuuvoq. Sumerpiaq inissinneqarnissaa ilusilersornissaa, aamma aqqusinerniornissaa qulaajarneqassapput, immikkualuttut ilanngullugit misissuisoqareerneratigut.

Illoqarfiup ilaa annertungaatsiartuq pilersuinikkut, eqqaaviit kuuffiisigut/illulerinermit erngup eqqakkap kuuffiisigut (matumani kuuffiit naleqqunnerusumut inissinneqarnissaat), isumagineqassapput, aammattaaq nunap iluata kissarnera misissorneqassaaq. Annanut eqqaavik, tele aamma tankeqarfik nunaminertanut illuliorfiusinnaasunut qanittumik inissisimapput, taamaattumik, ungasinnerusoq eqqarsaatigalugu, allanut nuunneqarsinnaanerat pisariaqalersinnaavoq.

Kangerluk angallanermi assartuinermilu periarfisanut tunngatillugu matoqqasorujussuarmik inissisimavoq, tamatumalu aqqiivigineqarnissaa eqqarsaatigineqartariaqarpoq, matumani nunaminertamik helistop-ilorfissamik immikkortitsisoqarsinnaavoq.

- **Silap pissusaa, avatangiiseq pinngortitarlu**

Qeqertarsuarmi eqqakkanut tigooraviliortoqarnikuuvoq eqqakkallu assartorneqartarnerannut misileraaviuvoq. Angissusaanut naleqqutinningsumik, illoqarfiup avataatungaani, aammaannartumik eqqakkanik ikuallaasoqartarpoq. Tamanna qimallugu eqqakkanik isumaginneriaatsimik pitsaannerusumik pilersarusiortoqartariaqaraluarpoq, assersuutigalugu eqqakkanik assartuineq. Aamma Kangerlummi eqqaavissuup inissisimaffia nalilersuiffiqeqqinneqartariaqarsorinarpoq.

Qeqertarsuarmi pinngortitaq immikkuullarissuuvoq Qeqertarsuup Tunuanilu innuttaasunit tamanit, takornarianillu atugarineqarluni. Taamaattumik immikkut pingaruteqarpoq pinngortitami nunaminertat illersugaasut ersarissaassutiginnissaat, ilutigisaanillu nunaminertat atorineqarsinnaanerit periarfissiuullugit, assersuutigalugu annikitsunik ikaartarfilersuinikkut, aqqusineqqat amerliserisigut, aamma nunaminertanik qasuersaartarfittut atugassanik tunniussisoqarneratigut.

- **Suaasaniit kingornussarsiat allanngutsaaliuinerlu**

Iloqarfiup oqaluttuassartaa, Avannaani illoqarfinni pingaarnersaasimaneraninngaanneersoq pissanganartuuvoq, illullu eriagisariillit arlallit mianerineqartariaqartut, ilaatigut katersugaasiviup piorsarneratigut, aamma illut allatut, ullutsinnut naleqquttumik atorineqarnerisigut, illersorneqarsinnaapput. Qimusserneq tamatuma kulturikkut inuunerani qitiuvoq, tamannalu piviusumik pilersaarusernermi nukittorsarneqassaaq.

Aamma Qeqertarsuarmi inoqarfigisimasut atorneeruttut, ilaatigut Nipisat, Qullissallu atorineqarnerat, asimut pilersaarutikkut illersorneqassapput.

- **IT, tamat oqartussaaqataanerit oqaloqataanerlu**

Kommuneplani tassaalissaaq pitsaasumik siunnerfilimmilu ingerlatsinermit sakkoo pingaarutilik, atorineqarneralu innuttaasunut paasissutissiissutigineqassaaq, kommunillu ineriartortitaasa oqallissutigineqartarnissaanut inissaqartitsisoqassaaq. Innuttaasut kommunillu akornanni oqaloqatigiinneq nukittorsarneqassaaq, aammattaaq attaveqaatit digitalisut aqqutigalugit.